



**BASLER
BEBBI
BASEL**
Jungi Garde

Es isch so wyt! ...

China hebt ab ...?... oder nit??

Basler Bebbi, Jungi Garde Fasnacht 2004

Es piffit und däscht, es knallt und dreehnt!
China isch uss em Gleich,
d Mamme rieft zem Bändeldanz.
Isch z Peking Morgestraich?

Ganz Peking lacht! Ganz Peking schwäbt!
Ganz China hebt hytt ab.
Ganz China fyirt dr Yang Li-wei.
Dr Ryysschaps fliesst nit z knabb!

Ganz China kocht, ganz Peking braut
Pekingänte puur
S git Stäblignusch, beef Setschuan
mit Gyggel siess und suur!

In China broodlets, Peking schwooft!
E jede schwingt e Faahne,
s Neyoor wird hitt im Summer gfyirt,
China? Wo fiehrt s aane?

Ganz China toobt, ganz China danzt!
Ganz Peking isch e Baiz!
Denn China hett – e Taikonaut!
Das isch dr bsunder Raiz!

(Taikong haisst Wältruum uff Chineesisch.
Dr Aschdronaut, wo e Chinees isch,
haisst Taikonaut , nur nääbebi,
soll das doo – bref – en Info sii!)

China hett noch vierzig Jeerli
noch Russland und de USA
s letscht Joor s allererschi Keerli
am Himmel gwoggt, und frait sich draa!

China schiggt noch vierzig Jeerli
si erschte Himmelsfaahrer loos,
mit Brachtsstaart in dr Wieschi Gobi
schiggt äs dr Yang uff d Himmelsstroos.

D Shenzuu 5, die Wältruuhmkapsle,
dryllt um unsri alti Wält
vierzääh Mool e Ringelraihe,
bim Lande wird s Zyyt knabb verfället.

Dr Wen Jiabao, dr Presidänt,
schreit no där Missioon
zem Hyysli us und ganz verzyggt:
«Fleudel hellscht mi Soohn!»

Ganz China waiss, ganz China glaubts,
dr Ruumfaahrtschef hetts gsait,
Sitt hytt hänn mir e Wältruumheld,
dr beschti, wytt und brait!

Ganz China waiss zwor zimmlig gnau,
dass das im Wältruum usse,
nit uss aigner Kuchi kunnt.
(S isch kupferet bi de Russe!)

So wytt, so guet! Wie wunderbar!
Ganz China schwäbht im Glygg.
Luegsch neecher dri, denn breggelet
die Glyggswält, Stygg fir Stygg:

*Z China derf e Kind nit lääbe,
wenn's als zwaits uff d Wält wott koo.
Alti Kommunische glääbe
uff de Sässel, kain will goo!
Hiehnerpescht und Vogelsyychi,
s Rächt vom Mensch isch nit viil wäärt!
Armuert gitts, doch ai Schicht Ryychi
kontrolliert s Land und dr Määrt.
Sars und Grippe, Lungepescht
raise uus vom Raich der Mitte
hemmigsloos vo Oscht noch Wescht
Kinderarbet, Menschehandel
Folter, Hunger ... und ... und ... und ...
Wenn vollzieht sich deert dr Wandel,
wird China denn vo Grund uff gsund?*

Ganz China tobt, ganz China danzt!
Ganz Peking isch e Baiz:
Denn ... China het e Taikonaut!!!!
Das isch dr bsunder Raiz!